

Penularan COVID-19

'Rasa lebih selamat terus amal pakai pelitup muka'

Orang ramai mahu terus jaga SOP elak risiko jangkitan penyakit

Oleh Tuty Haryanti Ahmad Rodzi
bhnews@bh.com.my

Kuala Lumpur: Kebanyakan orang ramai masih mahu memakai pelitup muka walaupun Kementerian Kesihatan (KKM) membuat penetapan tidak mewajibkan pemakaiannya.

Kakitangan swasta, Nurhidayu Mat Noh, 33, berkata dia tetap mahu memakai pelitup muka selepas ini kerana menggunakan pengangkutan awam ke tempat kerja di ibu kota setiap hari yang mendedahkannya dengan risiko dijangkiti COVID-19 susulan berada di kawasan tertutup.

"Sehingga kini saya masih bimbang jika terlupa memakai pelitup muka, malah sentiasa meletakkan pelitup muka tambahan dalam beg sebagai perediaan.

"Walaupun kerajaan tidak lagi mewajibkan pemakaian pelitup muka, saya masih memilih memakainya kerana mengelak risiko jangkitan, tambahan pula



Kebanyakan orang ramai masih memilih untuk mengenakan pelitup muka terutama di kawasan tertutup ketika tinjauan di Putrajaya, semalam. (Foto Mohd Fadli Hamzah/BH)

tahun ini saya terkena jangkitan COVID-19 dan Influenza, selain untuk mengelak jangkitan penyakit lain," katanya.

Bagi pesara, Agilan S Ayapan, 56, sejak memakai pelitup muka selama dua tahun, dia sudah terbiasa dengan keadaan itu dan selesa meneruskannya selepas ini.

"Selain dapat mengelak penyakit, dengan pemakaian pelitup muka juga dapat menghindari masalah pencemaran alam yang berleluasa ketika ini.

"Ini juga sekali gus dapat

mengelak penyakit lain seperti alahan dan sebagainya," katanya yang menetap di Cheras.

Elak risiko wabak

Pelajar kursus Bioteknologi di **Universiti Malaysia Pahang (UMP)**, Mohd Zikrulhafiz Aizuddin, 20, pula berkata dia juga masih memilih memakai

pelitup muka bagi mengelak risiko penularan penyakit terutama COVID-19 yang masih wujud ketika ini.

"Sebagai peniaga minuman secara sambilan, saya berasakan pelitup muka masih penting ke-

rana kita tidak tahu siapa yang berpenyakit yang datang berjumpa kita setiap hari.

"Jadi dengan memakai pelitup muka, ia dapat mengurangkan penularan penyakit terutama COVID-19," katanya.

Bermula 1 Mei lalu, KKM mengumumkan kelonggaran pemakaian pelitup muka apabila ia tidak lagi diwajibkan di luar bangunan dan kawasan terbuka, namun pelitup muka masih wajib dipakai apabila berada di dalam bangunan dan pengangkutan awam termasuk e-hailing.

Penguatkuasaan pemakaian pelitup muka adalah berdasarkan peruntukan dalam Akta Pencegahan dan Pengawalan Penyakit Berjangkit 1988 (Akta 342).



Nurhidayu Mat Noh